

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Chief Minister Pu Lalduhoma’n ram dang atanga a rawn lut dan chah tumin Operation Jeriko an kalpui mek tih a sawi.
- 2. Sorkar laipuiin ramchhunga chhiah lak dan thar a siam chuan Mizoramah awmzia a nei chho tan.
- 3. Mizoram Pradesh Congress Committee chuan vawiin khan Dampa bial MLA by-election lo awm tura an party candidate turin Pu John Rotluangliana an ruat thu an puang.
- 4. Assam Cabinet chuan an state chhunga dan kalha pemte zawnehhuah leh nawrchhuah kalpuina tur Immigrants (Expulsion from Assam) Act,1950 inkaihhruaina tur SOP a pawm.

<><><>

CM

Chief Minister Pu Lalduhoma’n Mizoramah ruihhlo hluar zel tur ven nan theihtawpin hma an la a ti a, ram dang atanga a rawn lut dan chah tumin Operation Jeriko an kalpui mek tih a sawi.

Chief Minister hian vawiin khan Hulhhliap Short Stay Centre tlawhin he hunah hian ruihhlo ngai te chu an nghei hlen theihna tur skill training changkang tak pek a tul thu a sawi a, ruihhlo avanga harsatna an tawh nasat avangin tlawmngai pawl leh Kohhran chu phungbawma sawmin PPP Mode in hmalakna kalpui ani tih a sawi.

Chief Minister chuan ruihhlo la ti ve lo, thangtharte hnenah drugs that lohzia uar takin zirtir a ni a ti a, Nasha Mukh Bharat Abhiyan hmangin district tinah campaign neih a ni tih sawiin thangtharte hnenah theihtawpa zirtir an tum thu a sawi.

Hulhhliap SSC hi tum khata mi 150 zel enkawl theihna tura duan ni mahse diltu an tam avangin batch hmasa berah mi 256, batch hnihnaah mi 544 leh batch thumna, tuna kalpui mekah hian mi 208 admit an ni a. Batch khat hi ni 20 chhung zel niin a tir lam ni 10 chhung detoxification kalpui a ni a, a dawt ni 5 chhung chu rilru lam enkawlna atan hman niin a bak ni 5 chu Synod Revival Department bultumin Camping neihzui thin a ni. An chhuah hnuah Referral Task Group ten thla thum chhung an thli thlai zui a, ruihhlo laka fihlim zuite tan Skill Training kalpui leh a ni.

<><><>

WORLD SUICIDE PREVENTION DAY

Vawiin khan khawvel hmun dang rualin Mizoramah pawh World Suicide Prevention day hman a ni.

He hun hi Mizoram University Auditorium-ah MZU Task Force on Mental Well-Being te buatsaih a hman a ni a, inkhawm hi thuang hnih a then niin tunlai khawvela rilru hriselna ngaih pawimawh a tulzia leh tanrual a ngaih zia sawi a ni.

Byte : Dr C. Zothanmawia

Ramchhunga zirna ina rilru lama harsatna nei an pun chhoh zel avangin Sorkar laipui hnuiaia Ministry of Education chuan thuchhuah siamin, Central Universities zawng zawngin an zirlai leh hnathawkte tan Mental Health Screening neih tur a ti a. He thuchhuah hi ngai pawimawhin MZU pawhin zirlaite leh hnathawk zawng zawng te tan screening hi a kalpui mek a ni.

<><><>

GST REFORMS

Sorkar laipuiin a Goods and Services Tax, GST chungchanga ruahmanna thar a siam chuan Mizoramah pawh a takin awmzia a nei chho tan.

Vawiin lama Akashvani palaiin Aizawl hmun hrang hranga sumdawngte a kawm kual naah, GST chungchanga sorkar laipui thuchhuah siam thar chuan awmzia a nei thui viau tura an rin thu an sawi hlawm a, hei hian mipuite tan pawh rah tha a chhuah an beisei tak meuh meuh thu an sawi hlawm bawk.

Mizoram a Suzuki, KIA leh Force dealer LBS motors hotute chuan GST ruahmanna thar chungchangah an lirthei zawrh tlakhniam dan tur ti hian an sawi.

<><><>

CONGRESS NAMES CANDIDATES FOR DAMPA BYPOLL

Mizoram Pradesh Congress Committee chuan vawiin khan Dampa bial MLA by-election lo awm tura an party candidate turin Pu John Rotluangliana an ruat thu an puang.

Candidate hi Congress President Pu Lal Thanzara’n vawiin khan an parry pisa Congress Bhavan ah a puang a, Dampa biala an candidate tur Pu John Rotluangliana hi MPCC Vice President ni lai a ni.

Pu John Rotluangliana hi nimin khan MPCC Vice President atan ruat a ni a, kum 1993 ah Lokichera bial ah MLA atan thlan tlin a ni a, kum 2008 leh kum 2013 MLA inthlanah Mamit bial atanga thlan tlin niin Deputy Speaker anih tawh bakah Supply, Transport leh Tourism Minister alo ni tawh bawk.

Dampa bialtu MLA Pu Lalrintluanga Sailo a boral avanga by-election neih turah hian sawrkar lai ZPM party chuan August ni 25 khan an party candidate atan Pu Vanlalsailova an lo puang tawh a, September ni 2 khan MNF Party chuan an party candidate atan Dr R. Lalthangliana an puang a, BJP Party pawhin candidate an nei dawn tih sawiin an puan hun tur erawh an la sawi lo a ni.

<><><>

RTI

Mizoram Information Commission chhinchhiah danin, Mizoram chhung bikah kum 2006 atanga vawiin thlengin RTI act hmanga zawhna 43412 thehluh a ni tawh.

Mizoram Information Commission-in Akashvani Aizawl a hrilh danin, kumin sorkar tangka kumthar ni, April ni 1 atanga RTI act hmanga zawhna an dawn tawh chu 3162 a tling tawh a, Right to Information Act hmanga zawhna lut, sorkar lam atanga a chhanna duhkawp loh avanga zualko pawh kum 2006 atanga chhiarin mi 730 an awm thu leh heng an zualkona atanga chhanna an hmuh duhkawp loh avanga zualko nawn leh mi 197 an awm thu Mizoram Information Commission hotute hian an sawi bawk.

Mizoram Information Commission chhinchhiah danin Financial Year kalta chhung khan zawhna lut 7394 a awm a, hei hi RTI act hman tan a nih atanga zawhna luh tam ber kum a nih thu leh kum 2006 atanga chhut a kumin Financial Year tawp thlenga RTI act hmanga complain lut chhinchhiah zat chu 160 a nih thu Mizoram Information commission hotute chuan an sawi bawk.

Voicecast

Right to Information Act hi mipui sawrkar siamna hmanraw pawimawh tak a ni a, Langtlang sawrkar neihna tur leh sawrkarin ram a kaihhruai dan hrang hrang kan hriat ve theihna a ni a, mipuiten tangkai taka kan hman a, sawrkar kan khalh ngil a pawimawh hle a, tunlai thiamna hmanga RTI Online kalpui anih tawh hnuah RTI hmang kan pung chho ve zel a, RTI hmanga dilna lut te hi ni 30 chhunga tha taka chinfel nghal zung zung a ni thin a ni.

<><><>

CYMA

Central Young Mizo Association Central Co-ordination Committee (CCC) thukhawm chuan Inner Line Permit (ILP) chu tun aia khauh leh awmze nei zawka kalpui a nih theihna tur sorkar-a thlen an rel.

Central YMA pisa, Tuikhuahtlangah vawiin khan Central Co-ordination Committee (CCC) chu a vawi 103-na atan an thukhawm a, CYMA President Pu Lalhmachhuana chuan he hun hi kaihruaiin thurel tur chhawp chhhuah zinga sorkar khawih, YMA-in hma a lakna tur hrang hrang relho zingah Mizorama dan loa lutte tihtawp kawngah nasa zawkin sorkar in hmala rawh se tih te, Mizorama chak

lakluhna kawngpui pawimawh leh district hrang hrang pawhtu kawngpuite a chhiat avanga, mipuiten harsatna an tawh chu a ziaawm theih nan sorkarin tun aia chak zawkin hmala se tihte a tel a, heng bakah hian YMA khawih thil rel ho zingah Mizoram chhunga hnamdang sumdawng, phalna nei lo tam lutuk titem turin YMA in hmala rawh se tih te, ruihhlo do kawngah CYMA-in tun aia chak zawkin hma la se, ruihhlo ngaite enkawlina changtlung tak CYMA hian din ni rawh se tihte pawh a tel a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

EDUCATION MINISTER

School Education Minister Dr Vanlalhlana’n Lunglei ah Mizorama Cosmic Class hmasa ber leh Lunglei District leh Lungsan Aspirational Block-a zirna tihhmasawna tura hma lakna hrang hrang a hawng.

Khuallian Dr Vanlalhlana chuan National Education Policy 2020 leh State sawrkarin zirna kawnga hmasawna tura hmathlir a neih tihhlawhtlinna pakhat a nih thu a sawi a. Cosmic Class (Astronomy Lab) chu a awmna sikul bakah, sikul dangte pawhin tangkai taka an hman a beisei thu sawiin, hma lakna hrang hrang chu Lunglei District-a zirnaa a tha zawnga danglamna thlent a nih a beisei thu a sawi a. Zirna chu khawtlang tana hnawksak lo leh tangkai zawk ni tura mihring chhertu, vantlang tana hahdamna leh hahchawlhna thlent a nih thu sawiin, zirna kawnga hmasawn nan sawrkar bakah, tlawmngai pawl, sumdawng leh mi tin thawh ho a pawimawh thu a sawi.

Minister chuan SCERT hnuaiah kumin 3rd term atangin Mizoram chhunga sikul pawl 3 atanga pawl 8 chinah zawhna inang tlang hmang tura ruahman mek a nih thu sawiin, zirlaite'n chik zawka thil an ngaihtuah thiam nan leh zawhna an zawh thiam theih nan exam zawhnaah thuziak dah chhuah hmanga zawhna siam te pawh tihtel tum a nih thu a sawi bawk.

<><><>

SAINIK DATA

Mizoram Sainik Welfare and Resettlement chhinchhiah danin tun dinhmunah Mizoram chhungah sipai bang, ex-servicemen sorkar-a inziaklut 6355 an awm mek.

Akashvani Aizawl zawhna chhangin Mizoram Sainik Welfare and Resettlement hotute chuan ex-servicemen 6355 an awm thu an sawi bakah ex-servicemen ten an kawppui an boralsan in ziaklut zat chu 2550 an tlin tawh thu an sawi a, indopui pahnihna hun laia sipai, World War 2 veteran Mizoram la dam zat chu pasarih an nih thu leh, indopui hnulaia an pasalte sipai a tangin a an thihsan zat hmeithai chhinchhiah zat chu 222 an tlin thu an sawi bawk.

Kan correspondent report i lo ngaithla ang.

Voicecast

Mizoram Sainik Welfare and Resettlement chuan India sipai a tang pension ta te chhinchhiah leh an hamthatna hmuh theih ang ang lo bawhzui sak kawngah nasa takin ke an pen thin a, tun dinhmuna Mizoram Sainik-in a chhinchhiah danin indona avanga sipai ramtuileilo a chhuak chu Mizoram-ah 58 an awm bakah an pasalten indona avang leh an duty laia an boral san tak hmeithai 58 an awm mek bawk.

<><><>

ASSAM

Assam Cabinet chuan an state chhunga dan kalha pemte zawnychhuah leh nawrchhuah kalpuina tur Immigrants (Expulsion from Assam) Act,1950 inkaihhruaina tur SOP a pawm. He SOP ang hian District Commissioner (DC) te chu amdagmi hmuhchhuah chu hnawhchhuahna thupek pe turin thuneihna pek an ni a. Chief Minister Himanta Biswa Sarma chuan hemi chungchang hi chanchinbumite hrilhin ramdagmi zawnychhuah leh hnawhchhuah hi Foreigners Tribunal kuta dah chuan hun a duh rei thin tih a sawi a ni. DC te hian ramdagmi nia rinhllehthe hi ni 10 chhung insawifiahna hun pek an ni ang a, hemi chhunga an insawifel theihloh chuan hnawhchhuah nghal an ni ang a ti.

<><><>

GST

Prime Minister Narendra Modia'n kumin Independence Day lawmnah GST chhuan thar hman a nih tur thu a puang a. Hei hi tun thla ni 3 a GST Council thukhawm chuan a taka rawn ti puitlingin chhiah lak dan chhawng li ni thin chu chhawng hnihah titlemin awlsam zawkin a rawn siam danglam a. GST zaa 5, 12, 18 leh 28 a lak thin chu zaa 5 leh 18 ah tihhniam a ni a. Mi naran leh mi nawlpuite tana hlawkna thlen thei tur berin he GST hi siamrem a ni.

Ramchhunga GST hman thar tur chuan Education Sector lama bungraw mante a ti tlawm dawn a. Heng pencil, pencil zumna, rawng, Exercise bu, Graph bu, Map leh chart manahte GST zaa 12 a tihtlem a ni a. Pencil nawhrehna eraser pawh GST zaa 5 lak thin chu tihtawp a ni tawh bawk.Engineering zirlai pakhat chuan hetianga GST lak a tlakhniam tak avang hian an mamawh hmanrua leinaah sum tam tak an hum thei dawn tih a sawi.

<><><>